

Fundacion Un Oportunidad Mas (FUNOM) ta desea di sirbi mas, cu bo cooperacion

ORANJESTAD (AAN): Fundacion Un Oportunidad Mas, tambe conoci manera F.U.N.O.M., ta un fundacion di boluntario cu ta existi di aña 2009, cu e meta di ofrece un contribucion y alivio real na nos comunidad, door di duna ayuda na esunnan cu e malesa di adiccion.

Durante un conferencia di prensa presidente di e fundacion Sullivan Sutherland a trece dilanti cu loke cu ta hopi particular di F.U.N.O.M. ta cu el a ser funda pa personanan cu nan mes a ser rehabilita aki na Aruba mes y cu actualmente tin entre 8 te cu casi 20 aña "limpi y sober."

Nan ta completamente reintegra den e sistema laboral y tur dia ta aportando na nos pais Aruba. Banda di e personanan aki a uni nan mes un cantidad di hende cu nunca tabata tin e malesa di adiccion nan mes, pero cu si a ripara cu mester actua y mester yuda den nos comunidad, pasobra e situacion ta grave y e ta urgente.

E problematica di adiccion ta uno cu ta toca cada un di nos den e comunidad aki di un forma directo of indirecto y F.U.N.O.M. ta enfatisa su

esfuerzonan mas tanto ariba loke cu ta trata esunnan cu e problema di adiccion cu ta ambulante; esta, esunnan cu no tin lugar fiho pa biba of un manera sigur, fuera di peliger pa haya na mes.

Un ehempel di un di e tareanan cu F.U.N.O.M. a bin ta haci den e ultimo añanan ta cu un cantidad di su miembronan ta fungi manera "straathoeckwerkers." Esaki ta e persona cu ta acerca y gana e confianza di e persona den adiccion, combersa cu ne te ora cu e por mustre cu tin un otro perspectiva na su situacion pa asina dune un empuhe pa e ricibi ayuda. Di e momento eynan, F.U.N.O.M. ta traha cerca cu otro instancianan den nos comunidad cu ta yuda pa e persona den adiccion bay afo pa bay rehabilita.

Sutherland a sigui bisa cu FUNOM for di algun aña caba tabata yuda e adiccionan cu necesidadnan basico manera paña, coos di come etc.

"Nos a ripara si cu tin un gap unda cu e persona cu mester di ayudo di biaha, no por a haya esaki".

"Ta full un proceso di red tape tin prome cu e yega unda cu e tin cu yega".



Esaki segun Sutherland, kende a sigui bisa FUNOM a wak cu eynan por yuda e adiccionan.

"E clientenan conoce nos y nan ta acerca nos unda cu nos ta".

"Nos ta e prome contacto cu e cliente cu ta sufriendo ainda riba caya".

Esaki segun presidente di FUNOM kende a sigui bisa cu in di e prome cosnan cu mester worde haci ta regla e papelnan legal di e persona, pasobra e tin mester di entre otro un carchi di AZV y di identificacion.

Hopi biaha no por haci un test di laboratorio pa e adicto, sin su carchi di AZV.

Sutherland a splica cu FUNOM a yega asina leu cu nan tin un cooperacion cu AZV unda cu nan por bay y yega haya e

carchi pa e cliente.

Loke ta pasa hopi biaha si ta cu e cliente no por haya ayudo di biaha y drenta un centro.

E tin cu bay riba un lista di espera.

E por bay na e centro CAA pa cuida diario, pero e cliente por cansa di esey y bay uza droga back.

FUNOM sinembargo ta yena e gap ey, segun Sutherland.

El a sigui bisa cu FUNOM tin un lugar safe unda e cliente por warda y keda pafo di e circulo di uso di droga, te ora cu e ta cla pa bay un centro di rehabilitacion.

FUNOM tin u cas na su disposicion den Sint Eustatius straat den Village na San Nicolas.

Segun presidente di e

fundacion, FUNOM ta bezig ta recauda fondo pa dos meta. E prome meta ta pa 'upgrade' e cas cu ta worde uza pa yuda e adiccionan.

Intencion ta entre otro pa pone un baño mas.

E di dos meta ta pa drecha un tereno mas cu tin, pa tin un lugar special pa 'opvang' di hende muher adicto.

Asina por separa e clientenan femenino for di esnan masculino.

Den e cas di FUNOM ta prepara e cliente pa ora cu e drenta un centro di rehabilitacion, pasobra ora cu e ta riba caya e no tin structura ni disciplina. Den e cas di FUNOM ta duna e cliente disciplina door di entre otro pone lanta na tal ora, y laga e haci cierto tareanan, pa asina e tin e structura diario di un persona normal.

Intencion ta pa logra recauda 50.000 Florin pa cuminsa.

Esnan cu kier yuda FUNOM por deposita riba e cuenta di FUNOM cu ta cuenta di CMB 600331002.

Miembronan di FUNOM ta bay para na diferente localidad tambe di dia 24 di September te cu prome di October, pa colecta placa di esnan cu kier yuda e bon causa.